

**DEKLARACIJA
O PODRŠCI ZAHTJEVIMA ZA OBRAZOVANJEM DJECE NA
MATERNJEM JEZIKU I PRAVU NA NACIONALNU GRUPU
PREDMETA**

Imajući u vidu da je u članu II 3. Ustava Bosne i Hercegovine propisano da sva lica unutar teritorije Bosne i Hercegovine uživaju ljudska prava i slobode među kojima je i pravo na obrazovanje;

Naglašavajući da je u članu II 4. Ustava Bosne i Hercegovine svim licima osigurano uživanje prava i sloboda predviđenih u ovom članu ili u međunarodnim sporazumima navedenim u Aneksu na Ustav Bosne i Hercegovine i da su sva lica u Bosni i Hercegovini slobodna od diskriminacije po bilo kojem osnovu, kao što je spol, rasa, boja, jezik, vjera, političko i drugo mišljenje, nacionalno i društveno porijeklo povezano sa nacionalnom manjinom, vlasništvo, rođenje ili drugi status;

Ukazujući na činjenicu da je u članu II 6. Ustava Bosne i Hercegovine propisano da će Bosna i Hercegovina i svi sudovi, agencije, vladini organi i instrumenti kojima entiteti upravljaju ili unutar entiteta primijeniti i pridržavati se ljudskih prava i fundamentalnih sloboda predviđenih u članu II Ustava Bosne i Hercegovine;

Podsjećajući da je članom 2. Protokola I. uz Evropsku konvenciju o zaštiti ljudskih prava i osnovnih sloboda propisano kako niko ne može biti lišen prava na obrazovanje i da u vršenju svih svojih funkcija u oblasti obrazovanja i nastave država poštuje pravo roditelja da osiguraju takvo obrazovanje i nastavu koji su u skladu sa njihovim vlastitim vjerskim i filozofskim uvjerenjima;

Naglašavajući da je članom 35. Okvirnog zakona o osnovnom i srednjem obrazovanju u Bosni i Hercegovini propisano da škola ne smije vršiti diskriminaciju u pristupu djece obrazovanju ili njihovom učenju u obrazovnom procesu na osnovu rase, boje, spola, jezika, religije, političkog ili drugog mišljenja, nacionalnog ili socijalnog porijekla, na osnovu toga što su djeca sa posebnim potrebama, ili na bilo kojoj drugoj osnovi;

Uvjereni da je primarni interes škole da promovira i razvija stalno i dinamično partnerstvo škole, roditelja i sredine u kojoj žive u svim pitanjima od značaja za ostvarivanje funkcije škole i interesa i potreba učenika;

Odlučni u namjeri da osiguramo punu nacionalnu ravnopravnost i najviše standarde ljudskih prava i osnovnih sloboda na cijeloj teritoriji Bosne i Hercegovine;

Na osnovu člana 138. stav 2. i člana 140. Poslovnika o radu Doma naroda Parlamenta Federacije Bosne i Hercegovine i na osnovu člana 146. stav 2. i člana 149. Poslovnika Predstavničkog doma Parlamenta Federacije Bosne i Hercegovine, Parlament Federacije Bosne i Hercegovine je, na sjednici Doma naroda Parlamenta Federacije Bosne i Hercegovine, održanoj 24.10.2013. godine, i na sjednici Predstavničkog doma Parlamenta Federacije Bosne i Hercegovine, održanoj 29.10.2013. godine, donio

DEKLARACIJU O PODRŠCI ZAHTJEVIMA ZA OBRAZOVANJEM DJECE NA MATERNJEM JEZIKU I PRAVU NA NACIONALNU GRUPU PREDMETA

1. Podržavaju se zahtjevi roditelja djece iz Republike Srpske kojim se traži od nadležnih institucija Republike Srpske da se djeci omogući izučavanje nacionalne grupe predmeta te da se adekvatno riješi nacionalni sastav Školskog odbora u Konjević Polju.

2. Pozivaju se nadležne institucije na svim nivoima vlasti u Bosni i Hercegovini, prvenstveno Ministarstvo prosvjete i kulture Republike Srpske da u skladu sa Ustavom Bosne i Hercegovine i ustavima entiteta i kantona riješe probleme - kako djece iz Konjević Polja, tako i djece u cijeloj Bosni i Hercegovini.
3. Pozivaju se nadležne institucije na svim nivoima vlasti u Bosni i Hercegovini da omoguće neometano pravo na obrazovanje na njihovom maternjem jeziku za svu djecu u skladu sa ustavom.
4. Poziva se Visoki predstavnik za Bosnu i Hercegovinu da u skladu sa svojim mandatom utiče na ostvarivanje prava na obrazovanje i vraćanje djece u školske klupe.
5. Ova deklaracija objavit će se u "Službenim novinama Federacije BiH".

PFBiH broj: 01,02-02-1101/13
29. oktobra 2013. godine
S a r a j e v o

PREDSJEDAVAJUĆI
DOMA NARODA
PARLAMENTA FEDERACIJE BiH

Radoje Vidović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BiH

Fehim Škaljić